

» sum Ecclesiam Dei. » Bene dicis : unde debuisti damnari, ab eo accepisti unde debeas coronari. A quo accepisti unde debeas coronari ? A quo accepit, vultis audire ? Nolite me, ipsum audite : « Non sum, inquit, dignus vocari Apostolus, quia persecutus sum Ecclesiam Dei ; sed » gratia Dei sum id quod sum¹. » Ergo quod eras, iniquitatetuaeras; quod es, gratia Dei es. « Et gratia ejus, inquit, » vacua in me non fuit. » Ecce evangelizat fidem, quam aliquando vastabat : nec gratia ipsa vacat in illo, qui ait : « In me vacua non fuit, sed plus omnibus illis laboravi. » Observa, erigere te coepisti. Ubi es, Paule? Certe modicus eras. Plus omnibus illis laboravi. Dic unde? « Quid enim habes quod non accepisti²? » Statim respexit : et cum dixisset : « Plus omnibus illis laboravi ; » quasi expavit ad verba sua : et mox subjicit se humilem Paulum : « Non autem ego, sed gratia Dei mecum. »

¹⁹ VIII. Ergo, fratres mei, ut noveritis etiam fidem a Domino Deo esse nobis, orate³ pro illis qui nondum crediderunt. Si quis habet amicum forte infidelem, moneo illum ut oret pro illo. Vere opus est ut ego illum moneam? Maritus Christianus est, uxor infidelis est : non orat pro uxore sua, ut credat? Uxor est Christiana, maritus infidelis est : non orat mulier religiosa pro marito suo, ut credat? Quando hoc orat qui orat, quid orat, nisi ut Deus det illi fidem? Ergo donum Dei est fides. Nemo se extollat, nemo sibi arroget, quasi sibi aliquid dederit. « Qui gloriatur, in Domino glorietur⁴. »

¹ Cor. xv, 9, 10. — ² Id. iv, 7. — ³ Forte oratis. — ⁴ 1 Cor. i, 31.

SERMO CLIX¹.
De verbis Apostoli, Philip. III. *Nos enim sumus circumcisio, qui spiritui Dei servimus, etc. Contra Pelagianos.*

I. Ad Apostolicam lectionem aures et animum intendat Sanctitas Vestra, adjuvando nos affectu vestro apud Dominum Deum nostrum, ut ea quae ille nobis revelare dignatur, ad vos apte atque salubriter proferre possimus. Ergo cum legeretur, audistis dicentem apostolum Paulum : « Nos enim sumus circumcisio, qui spiritui Dei servimus². » Scio plerosque codices habere, « Qui spiritu Deo servimus. » Quantum autem inspicere potuimus, plures Graeci hoc habent, « Qui spiritui Dei servimus. » Sed non ibi quæstio est. Manifestum est enim utrumque, et congruum regulæ veritatis, quia et spiritui Dei servimus, et non carne, sed spiritu Deo servimus. Carne enim servit Deo, qui de rebus carnalibus sperat se placere Deo. Cum vero et ipsa caro ad bona opera spiritui subditur, spiritu servimus Deo : quia carnem domamus, ut spiritus obtemperet Deo. Spiritus enim regit, caro regitur : nec spiritus bene regit, si non regatur.

II. Cum ergo ait : « Nos sumus circumcisio ; » videte quid voluerit intelligi in illa circumcisione, quæ in umbra data est significante, quæ remota est luce veniente. Cur autem non dixerit : Nos habemus circumcisionem ;

¹ Alias xv, de verbis Apostoli. — Habitus ad mensam sancti martyri Cypriani. — ² Philip. iii, 3.

sed : « Nos sumus circumcisio : » sic accipite hoc voluisse Apostolum dicere : Nos sumus justitia. Circumcisio enim justitia est. Magis autem commendat, quod dicit dicendo nos esse justitiam, quam dicendo nos esse justos : ita tamen ut cum justitiam dicit esse, justos intelligamus. Non enim sumus illa incommutabilis justitia, cuius participes facti sumus : sed quemadmodum dicitur : Magna ibi juventus est, pro multis juvenibus ; sic dicitur justitia, ut intelligantur justi. Audite hoc ipsum evidentius, eodem dicente Apostolo : « Ut nos, inquit, simus justitia Dei in ipso¹. » Nos simus justitia, non nostra, sed Dei ; ab illo accepta, non a nobis assumpta ; impartita, non usurpata ; donata, non rapta. Cuidam enim rapina erat esse æqualis Deo : et quoniam quæsivit rapinam, invenit ruinam. Dominus autem noster Jesus Christus, cum in forma Dei esset, non rapinam arbitratus est esse æqualis Deo². Cui enim æqualitas Dei natura erat, rapina non erat. Sed tamen semetipsum exinanivit, formam servi accipiens, ut nos essemus justitia Dei in ipso. Si enim ille paupertatem vitaret, nos paupertate non careremus. « Pauper enim ille factus est, cum dives esset ; ut illius paupertate, sicut scriptum est, nos ditaremur³. » Divitiae illius quid nos facturæ sunt, cuius paupertas nos divites facit ? Apostolus ergo non tibi negavit circumcisionem, sed exposuit ; lucem prætendit, umbram removit.

III. « Nos sumus, inquit, circumcisio, qui spiritu Deo servimus, et gloriarnur in Christo Jesu, et non in carne fidentes. » Respxit quosdam in carne fidentes : ipsi erant qui de carnis circumcisione gloriabantur. De quibus alio loco dicit : « Quorum Deus venter est, et gloria in pudendis eorum⁴. » Intellige tu circumcisionem

¹ 2 Cor. v, 21. — ² Florus ad Philip. ii. — ³ 2 Cor. viii, 9. —

⁴ Philip. iii, 19.

et esto circumcisio : intellige, et esto. « Intellectus enim bonus, sed omnibus qui faciunt eum¹. » Non utique frustra octavo die jesus est infans circumcidit², nisi quia petra, qua circumcidimur, Christus erat. Cultellis enim petrinis circumcisus est populus³ : « Petra autem erat Christus⁴. » Quare ergo octavo die ? Quia in hebdomadibus idem primus qui octavus. Completis enim septem diebus, redditur ad primum. Finitur septimus, Dominus sepultus : redditur ad primum, Dominus resuscitatus. Domini enim resuscitatio promisit nobis æternum diem, et consecravit nobis Dominicum diem. Qui vocatur Dominicus, ipse videtur proprie ad Dominum pertinere : quia eo die Dominus resurrexit. Reddita est petra, circumcidantur qui volunt dicere : « Nos enim sumus circumcisio. Traditus est enim propter peccata nostra, et resurrexit propter justificationem nostram⁵. » Justificatio tua, circumcisio tua, non est a te. « Gratia salvi facti estis per fidem ; et hoc non ex vobis, sed Dei dominum est : non ex operibus⁶. » Ne forte dicas : Promerui, et ideo accepi : Non putes te promerendo accepisse, qui non promereris, nisi accepisses. Gratia præcessit meritum tuum : non gratia ex merito, sed meritum ex gratia. Nam si gratia ex merito, emisti, non gratis acceperisti. « Pro nihilo, inquit, salvos facies eos⁷. » Quid est : « Pro nihilo salvos facies eos ? » Nihil in eis invenis unde salves, et tamen salvas. Gratis das, gratis salvas. Omnia merita præcedis, ut dona tua consequantur merita mea. Prorsus gratis das, gratis salvas, qui nihil invenis unde salves, et multum invenis unde damnes.

IV. « Nos ergo, inquit, sumus circumcisio, qui spiri-

¹ Psal. cx, 10. — ² Gen. xvii, 12. — ³ Levit. xii, 3, et Josue. v, 2. —

⁴ 2 Cor. x, 4. — ⁵ Rom. iv, 25. — ⁶ Ephes. ii, 8, 9, et Florus ibidem. —

⁷ Psal. lv, 8.

» tui Dei servimus, et gloriamur in Christo Iesu¹. Qui
» gloriatur, in Domino gloriatur²: Et non in carne fiden-
» tes. » Et quid est, fidere in carne? Audite, inquit.
« Quanquam ego, inquit, habeam fiduciam et in carne.
» Si quis alias in carne putat se habere fiduciam, magis
» ego³. » Ne arbitremini, inquit, me hoc contemnere,
quod non habeo. Quid magnum est, si homo abjectus,
plebeius, ignobilis, contemnat nobilitatem, et tunc exhibe-
at veram humilitatem? « Quanquam ego, inquit, ha-
» beam fiduciam et in carne. » Ideo vos, inquit, doceo
contemnere, quoniam videtis me habere quod contem-
nam. « Si quis alias in carne putat se habere fiduciam,
» magis ego. »

V. Et audi in carne fiduciā: « Circumcisio octavi
» diei; » id est, non proselytus, non advena ad populum
Dei, non major circumcisus, sed a parentibus natus Ju-
dæus, habeo circumcisionem octavi diei. » Ex genere
Israël, de tribu Benjamin, Hebræus ex Hebræis, secun-
dum Legem Pharisæus⁴. » Primarii quidam erant, et
quasi ad nobilitatem Judaicam segregati, non contempti-
bili plebi commixti, qui dicebantur Pharisæi. Nam dicitur
hoc verbum, quasi segregationem interpretari, quomo-
do in Latina lingua dicitur egregius, quasi a grege
separatus. Fuerunt autem Israëlitæ, id est, ex genere
Israël, etiam illi qui separati fuerant a templo. Remansit
autem ad templum tribus Juda, et tribus Benjamin. Tri-
bus Levi in sacerdotibus, tribus Juda regia, et tribus
Benjamini, hoc solum remansit ad Jerusalem et ad tem-
plum Dei, quando facta est separatio illa in seruo Salo-
monis⁵. Non ergo leviter accipiat is qui ait: « Tribu
» Benjamin: » inhaerens Judæ, non recedens a templo.

¹ Philip. iii, 3. — ² 1 Cor. i, 31. — ³ Philip. iii, 4. — ⁴ Ibid. 5. —
⁵ 3 Reg. XII.

¹ Philip. iii, 19.

« Hebræus ex Hebræis, secundum Legem Pharisæus, se-
» cundum æmulationem persecutus Ecclesiam¹. » Inter
merita sua commemorat quod fuerit persecutor: « Secun-
» dum æmulationem, » inquit. Quam æmulationem? Non
eram, inquit, piger Judæus: quidquid erat quod Legi
meæ adversariorum videretur, impatienter ferebam, acriter
insequebar. Haec apud Judæos nobilitas: sed apud
Christum queritur humilitas. Ideo ibi iste Saülus, hic
Paulus. Saulus a Saüle nomen derivatur. Qui fuerit Saül,
noscis: ipsius electa est statura proceris. Sic eum descri-
bit Scriptura, quod supereminens esset omnibus, quando
electus est ut ungeretur in regem². Non fuit sic Paulus,
sed factus Paulus. Paulus enim parvus, ideo Paulus mo-
dicus. Ergo: « Secundum æmulationem, inquit, perse-
» quens Ecclesiam. » Hinc intelligent homines, qualis
apud Judæos fuerim, qui Christi Ecclesiam persecutus
æmulatione traditionum paternarum.

VI. Addit: « Secundum justitiam quæ est in Lege,
» qua fuerim sine querela³. » Novit Charitas Vestra, dictos
esse sine querela ambulasse in omnibus justificationibus
Domini Zachariam et Elisabeth⁴. In omnibus, inquit
Scriptura, justificationibus Domini ambulantes sine que-
rela. Ecce hoc erat et Paulus noster, quando Saulus erat.
In lege sine querela ambulabat: et quod in eo fuit sine
querela, hoc de illo faciebat magnam querelam. Quid
ergo putamus, fratres, esse sine querela secundum justi-
tiam, quæ in lege est, malum est? Si malum est, secun-
dum justitiam quæ in lege est, esse sine querela; ergo ali-
quid mali est lex? Sed habemus eumdem Apostolum
dicentem: « Itaque lex quidem sancta, et mandatum
» sanctum, et justum, et bonum⁵. Si lex sancta, et man-

¹ Philip. iii, 6. — ² 1 Reg. ix, 2. — ³ Philip. iii, 6. — ⁴ Luc. i, 6. —
⁵ Rom. vii, 12.

» datum sanctum, et justum, et bonum ; » secundum justitiam quæ est ex lege sancta, conversari sine querela, quomodo potest non esse bonum ? quomodo potest non esse sanctum ? An forte sanctum est ? Audiamus ipsum Apostolum ; videte quid dicat : « Quæ mihi lucra fuerunt, hæc propter Christum damna esse duxi. » Damna sua dicit, et inter damna sua computat, quod in justitia, quæ est in lege, fuerit sine querela. « Verumtamen, inquit, et arbitror omnia damna esse propter eminentem scientiam Christi Jesu Domini nostri. » Attendo, inquit, laudes meas, comparo eminentiæ Domini nostri Jesu Christi. Illud sitio, hoc contemno. Parum est hoc : « Propter quem arbitror, inquit, omnia non solum detrimenta esse, verum et stercora existimavi esse, ut Christum lucrifacerem¹. »

VII. Quæstio major exorta est, o Paule ! Si secundum justitiam, quæ in lege est, versabar sine querela, et hoc in detrimentis tuis, in damnis, in stercoribus computas, ut Christum lucrifacias ; ergo justitia illa a Christo prohibebat ? Obsecro te, expone hoc paululum. Deo potius dicamus, ut illuminet et nos, a quo ipse illuminatus est, qui Epistolam istam scripsit nobis, non atramento, sed Spiritu Dei vivi. Videtis, charissimi, quam sit arduum, quam difficile intelligere hoc, cum constet legem sanctam esse, et mandatum sanctum, et justum, et bonum ; constetque omnino inter fideles Catholicos ; ita ut nemo dissentiat, nisi qui non vult esse catholicus, hanc legem non datam nisi a Domino Deo nostro ; secundum istam justitiam, quæ in lege est, conversari sine querela, impedimentum fuisse Apostolo, ne veniret ad Christum ; nec eum venisse ad Christum, nisi hoc quod fuit secundum justitiam, quæ in lege est, sine querela, inter damna et detri-

¹ Philip. iii, 7, 8.

menta et stercora computasset. Sequamur ergo, et accedamus aliquantum, ne forte in ipsis verbis Apostoli elucescat nobis aliquid, unde ista removeatur et solvatur obscuritas. « Detrimenta, inquit, credidi hæc omnia, et stercora existimavi, ut Christum lucrifaciam. » Intendite, obsecro. Damna, detrimenta, stercora ista existimavi, in quibus etiam illud commemororo, quod fuerim sine querela secundum justitiam, quæ in lege est. « Existimavi ergo hæc omnia detrimenta et stercora, ut Christum lucrifaciam, et inveniar in illo, non habens meam justitiam, quæ ex lege est¹. » Qui prævenistis intellectu expositionem, arbitramini vos tanquam veloces in via cum tardioribus ambulare. Celeritas aliquantum reprimatur, ne comes tardior deseratur. « Ut Christum, inquit, lucrifaciam, et inveniar in illo, non habens meam justitiam, quæ ex lege est. Si meam » dixerat, quare addidit « ex lege? » Si enim ex lege est, quomodo tua est ? Numquid tu tibi imposuisti legem ? Deus legem dedit, Deus legem imposuit, Deus legi suæ te obtemperare præcepit. Lex si non te doceret quemadmodum vivere deberes, quomodo posses habere justitiam sine querela secundum legem ? si secundum legem habes, quomodo dicis, « Non habens meam justitiam, quæ ex lege est, » sed eam quæ est per fidem Christi, quæ est a Deo ? »

VIII. Jam ergo dicam ut potero : revelet melius qui vos possidet, donet et intellectum et affectum. Donabit enim effectum, si donabit affectum. Hoc est enim quod volo dicere : Lege Dei proposita, ipsa enim dixit : « Non concupisces² : » Lege ergo Dei proposita, exceptis illis carnalibus sacramentis, quæ fuerunt umbræ futurorum ; lege Dei proposita quisquis tumuerit, et suis viribus eam implere se posse putaverit, et fecerit quod lex jubet, non

¹ Philip. iii, 9. — ² Exod. xx, 16.

amando justitiam, sed timendo poenam; fuit quidem secundum justitiam, quae ex lege est, homo sine querela; non furatur, non adulterat, non dicit falsum testimonium, non facit homicidium, non concupiscit rem proximi sui: potest hoc, potest fortassis; unde? Timore poenae. Quanquam qui timore poenae non concupiscit, puto quia concupiscit. Terrore ingenti armorum atque telorum, et circumdantis forsitan multitudinis vel obviam euntis, etiam leo revocatur a preda: et tamen leo venit, leo redit; prædam non rapuit, non malitiam posuit. Si talis es, adhuc justitia est, qua justitia tibi consulis ne torquearis. Quid magnum est, poenam timere? Quis eam non timet? quis latro, quis sceleratus, quis nefarius? Sed hoc interest inter timorem tuum, timoremque latronis, quod latro timet leges hominum, et ideo facit latrociniū, quia sperat se fallere leges hominum: tu autem leges ejus times, ejus poenam times, quem fallere non potes. Nam si fallere posses, quid non fecisses? Ergo et concupiscentiam tuam malam non amor tollit, sed timor premit. Ad ovile venit lupus; latratu canum et clamore pastorum ab ovili reversus est lupus: ipse tamen semper est lupus. In ovem vertatur. Facit enim et hoc Dominus: sed ipsa est justitia ejus, non tua. Nam quādiū habes tuam, potes timere poenam, non amare justitiam. Ergo, fratres mei, habet delicias suas iniquitas, et justitia non habet? Delectat malum, et non delectat bonum? Delectat omnino: sed, « Dominus dabit suavitatem, et terra nostra dabit fructum suum⁴. » Ille nisi prior det suavitatem, terra nostra non habebit nisi sterilitatem. Hanc ergo justitiam concupivit Apostolus, delectatus est: memor fuit Dei, et delectatus est²: concupivit anima ejus, et aestuavit in atria Domini³; et

¹ Psal. lxxxiv, 13. — ² Id. lxxvi, 4. — ³ Id. lxxxiii, 3.

viluerunt omnia, quae pro magno habebat, facta sunt damna, detrimenta, stercore.

IX. Hinc enim erat et illud, quod Ecclesiam persequebatur secundum æmulationem paternarum traditionum⁴; inde erat, quia suam justitiam constituebat, non justitiam Dei quærebatur. Videte enim, quia inde persequebatur Ecclesiam. Quid ergo dicemus? ait alio loco ipse Apostolus: « Quia gentes quæ non sectabantur justitiam, apprehenderunt justitiam. » Sed quam? « Justitiam autem quæ ex fide est². » Gentes autem quæ non sectabantur justitiam, quæ ex lege est, » quasi propriam suam, quæ fit de timore poenae, non de amore justitiae, « Quia non sectabantur justitiam, apprehenderunt justitiam; justitiam autem quæ ex fide est. Israël autem, inquit, persecutus legem justitiae, in lege in justitiae non pervenit. » Quare? Quia non ex fide. Quid est, Quia non ex fide? Non speravit in Deum, non illam petivit a Deo, non credidit in eum qui justificat impium³: non fuit similis Publicano oculos in terram dejicienti, pectus suum percussienti, et dicenti: « Domine, propitijs esto mihi peccatori⁴. » Ergo persecutus legem justitiae, in legem justitiae non pervenit. Quare? Quia non ex fide, sed quasi ex operibus. Offenderunt enim in lapidem offensionis. Ecce unde Saulus persecutus Ecclesiam. Quando enim persecutus Ecclesiam, in lapidem offensionis offendebat. Christus humilis in terra jacebat: in celis quidem et ipse erat, levata illo carne sua a mortuis resuscitata; sed nisi et in terra Christus jaceret, non ipse Saulo clamaret: « Quid me persecueris⁵? » Ergo ille jacebat, quia humilitatem preferebat; ille offendebat, quia non videbat. Et totum hoc non videre, unde

¹ Galat. i, 14. — ² Rom. ix, 30, et I Cor. ibidem. — ³ Rom. iv, 5. — ⁴ Luc. xviii, 13. — ⁵ Act. ix, 4.

erat? De tumore superbiæ. Quid est, De tumore superbiæ? Quasi de justitia sua, Ex lege quidem, sed sua. Quid est, Ex lege? Quia in mandatis legis. Quid est, De sua? Tanquam de viribus suis. Amor deerat, amor justitiae, amor charitatis Christi. Et unde illi amor? Solus illum possidebat timor, sed charitati venturæ locum in corde servabat. Cum sœviret erectus, jactabundus, glorians apud ipsos Judæos, quod secundum æmulationem paternarum traditionum persecutus erat Ecclesiam; cum sibi videretur excelsus, audivit desperata vocem Domini nostri Jesu Christi, jam in cœlo sedentis, et adhuc humilitatem commendantis: « Saule, inquit, Saule, » quid me persequeris? Durum est tibi, adversus stimulum calces mittere¹. » Possem te dimittere: tu enim vexareris punctionibus meis, non ego frangerer calcibus tuis: sed non te dimitto. Sœvis, et misereor. Quid me persequeris? non enim timeo te, ne iterum crucifigas me: sed volo agnoscas me, ne occidas non me, sed te.

X. Horruit ergo Apostolus, percussus et prostratus, erectus et instructus. Factum enim est in illo: « Ego percutiam, et ego sanabo². » Non enim ait: Sanabo, et percutiam: sed, Percutiam, et sanabo. Percutiam te, et dabo tibi me. Sic prostratus horruit justitiam suam, in qua erat certe sine querela, laudabilis, magnus, quasi glorus apud Judæos: detrimenta existimavit, damna credidit, stercora deputavit, « Ut inveniretur in illo non habens suam justitiam, quæ ex lege est; sed eam quæ per fidem est Christi, quæ est, inquit, ex Deo. » Illi autem qui offenderunt in lapidem offensionis, quid de illis dicit ipse Apostolus? « Quia non, inquit, ex fide, sed tanquam ex operibus. Quia ipsi quasi sua justitia offenderunt in lapidem offensionis; sicut scriptum est:

¹ Act. ix, 4, 5. — ² Deut. xxxii, 39.

» Ecce pono in Sion lapidem offensionis, et petram scandali; et qui crediderit in eum, non confundetur⁴. » Qui enim crediderit in eum, non habebit suam justitiam, quæ ex lege est, quamvis sit bona lex; sed implebit ipsam legem, non sua justitia, sed data ex Deo. Ita enim non confundetur. « Charitas enim est legis plenitudo². » Et unde ista charitas diffusa est in cordibus nostris? Non utique a nobis, sed per Spiritum sanctum qui datus est nobis³. Offenderunt ergo illi in lapidem offensionis, et petram scandali⁴. Et ait de illis: « Fratres, bona voluntas quidem cordis mei, et deprecatio ad Deum pro illis in salutem⁵. » Deprecatur Apostolus pro non creditibus, ut credant; pro aversis, ut convertantur. Videtis quia nec ipsa conversio sine Dei adjutorio. « Deprecatio, » inquit, ad Deum pro illis ad salutem. Testimonium enim perhibeo, quia zelum Dei habent. » Sic habebat et ipse: zelum Dei habebat. Sed quomodo ipse habebat? Quomodo illi habebant: « Sed non secundum scientiam⁶. » Quid est hoc, « Non secundum scientiam? » Ignorantes enim Dei justitiam, et suam volentes constituerent⁷. » Unde iste correctus inquit, « Non habens meam justitiam. » Illi volunt suam constituere, adhuc eos delectat in stercore jacere. Ego non habeo meam justitiam, sed eam quæ est per fidem Christi, justitiam ex Deo; « Justitiam, inquam, ex Deo, qui justificat impium. »

XI. Tolle te, tolle, inquam, te a te, impedis te: si tu te ædificas, ruinam ædificas. « Nisi Dominus ædificaverit domum, in vanum laboraverunt qui ædificant eam⁸. » Noli ergo velle habere justitiam tuam. Certe ex lege est, nempe ex lege est: certe Deus dedit legem, et quia jus-

¹ Rom. ix, 32, 33, et Isaï. xxviii, 16. — ² Rom. xiii, 10. — ³ Id. v, 5.

— ⁴ Id. ix, 32. — ⁵ Id. x, 1. — ⁶ Ibid. 2. — ⁷ Ibid. 3. — ⁸ Psal. cxlvii, 1.